

四庫全書

子部

欽定四庫全書

太平御覽卷二百九十五

宋 李昉等 撰

兵部二十六

審察

避銳

安衆

審察

孫子曰兵怒而不相迎交而不合又不相去必謹察之

備奇
伏也

左傳曰齊師伐魯敗退魯莊公將逐之曹劌曰未可夫

大國難測也懼有伏焉

恐詐而奔也

吾視其轍亂望其旗靡

故逐之

旗靡轍亂
怖遽也

又曰秦晉戰于河曲秦行人夜戒晉師曰兩君之士皆

未愁也明日請相見也

愁切也
魚覲切

晉大夫史駢曰使者目

動而言肆懼我也

目動心不安言肆
聲放失常節也

將遁矣薄諸河必

敗之

薄迫也

晉裨將胥甲趙穿當軍門呼曰死傷未收而

棄之不惠也不待期而薄人於險無勇也乃止秦師果夜遁

又曰晉侯伐齊齊侯畏其衆齊師夜遁師曠曰烏烏之

聲樂齊師其遁

鳥烏得空故樂也

邢伯曰有班馬之聲

夜遁馬不聞見

故鳴班列也

齊師其遁叔向曰城上有烏齊師其遁

又曰晉師伐楚將戰楚子登巢車以觀晉軍

巢車車上為櫓

楚

將子重使太宰伯州犂侍於王後

州犂晉伯宗子先奔楚

王曰騁

而左右何也

騁走

曰召軍吏也皆聚於中軍矣曰合謀也

張幕矣曰虔卜於先君也徹幕矣曰將發命也甚囂且

塵上矣曰將塞井夷竈而為行也

夷平行
戶郎切

皆乘矣左右

執兵而下矣曰聽誓也

左將帥
右車右

竟敗楚於鄢陵

鄢音
姬

魏志曰玄德遣將吳蘭屯下辯曹公遣曹洪征之以曹休參
軍事玄德遣張飛屯固山欲斷軍後眾議狐疑休曰賊實斷
道者當伏兵潛行今乃先張聲勢此其不能也宜及其未集
促擊蘭破則飛自走洪從之進兵擊蘭大破之飛果走

宋書曰東晉末武帝率兵北伐圍南燕慕容超於廣固

未下時後秦姚興遣使告宋武云慕容見與鄰好以窮告急今當遣鐵騎一萬遙據洛陽晉軍若不退者便當長驅而進宋武答興使曰語汝姚興我定燕之後息甲三年當平關洛今能自送便可速來穆之聞興使入而宋武發遣已去以興所言并答具語穆之穆之曰常日事無大小必賜與謀此宜善詳云何率爾便答未能威敵正足怒彼耳若燕未可拔興救奄至不審何以待之宋武笑曰此是兵機非卿所解故不語耳夫兵貴神速

彼若審能遣救必畏我知寧容先遣信命此是其見我
伐燕內已懷懼自強之辭耳興竟不能出師廣固終拔
擒慕容超平齊地

又曰武帝自京口舉義兵討桓玄玄將桓謙屯於東陵
卞範屯覆舟山西以拒之宋武疑賊有伏兵謂小將劉
鍾此山下當有伏兵卿可率部下往取之鍾應聲馳進
果有伏兵數百一時奔走

又曰雍州刺史袁粲舉兵反浚流入鵲尾與官軍相持

既久官軍主張興世越鵲尾上據錢溪覬將劉胡攻之
不下遣人傳唱錢溪已平官軍之衆並懼宋將沈攸之
曰不然若錢溪實敗萬人中要應有逃亡來者必是彼
戰失利唱空聲以惑衆耳勒軍中不得輒動錢溪信尋
至果大破賊攸之悉以錢溪所送胡軍耳鼻示人覬駭
懼急追胡還遂潰走

後魏書曰司馬楚之討蠕蠕蠕潛遣謀者

蠕而宣切

入楚

之軍截驢耳而去有告失驢耳者諸將莫能察楚之曰

必是覘賊截之以為驗耳賊將至即使軍人伐柳為城
水灌令凍城立而賊至冰峻城固不可攻逼敗乃走散
世祖聞而嘉之

又曰韓果性强記兼具有權畧所行之處山川形勢輒
能記憶兼善伺敵虛實揣知情狀有潛匿溪谷欲為間
遁者果登高視之所疑之處往必有獲

通典曰周武帝帥師攻圍高齊晉州齊後主將兵十萬
自來援之時柱國陳王純屯千里逕大將軍永昌公椿

屯雞棲原大將軍宇文盛屯汾水關并受齊王憲節度
憲密謂椿曰兵者詭道去留不定見機而作不得遵常
汝今為營勢令兵去之後賊猶致疑不須張幕可伐疑
也時齊分軍萬人向千里還又令其衆出汾水關自率
大兵與椿對陣宇文盛馳騎告急憲自以千騎救之齊
人覩谷中塵起相率遽退盛與柱國侯莫陳曷涉汾逐
之多有斬獲俄而椿告齊衆稍逼憲又迴軍赴之會被
勅追還夜返齊人果謂椿張幕不疑軍退翌日始悟

軍識曰夫用兵者必察敵國之情視其倉廩度其餘糧以卜其強弱運糧二百里者無二年之食也運糧三百里者無三年之糧也是謂虛國民窮上下不相親則有離叛心上行暴虐則下刻急相殘賊是為亡國若進惡不退羣賢隱蔽不肖在位國受其害內貪外廉竊公為恩飾躬正顏以獲高官是謂盜端

避銳

孫子曰少而逃之

高壁壘勿與戰也彼衆我寡師不可敵則軍自逃守匿其形也不若

則能避之

若兵避之強弱不敵勢不相若則引軍避之待利而動

故小敵之堅大

敵之擒

雖小不能當大言小國不量其力敢與大邦為讐雖權時堅城固守然後必見擒獲春秋傳曰既

不能強又不能弱所以敗也

無邀正正之旗無擊堂堂之陣此理變

者也

正正者整齊也堂堂者大也威盛貌正正者孤特相也言前有孤特之兵後有堂堂之陣必有奇伏

詐誘之謀審察待之勿輕邀截此理變詐者也

是故朝氣銳晝氣惰暮氣歸善

用兵者避其銳擊其惰歸此理氣者也

避其精銳之氣擊其懈惰欲歸

此理氣者也故曹劌曰夫兵者勇氣也一鼓作氣再而衰三而竭彼竭我盈是以剋之也

戰國策曰魏武侯問吳起曰暴寇卒至掠吾田野取吾

牛馬則如之何起曰暴寇之來必精且強善守勿應潛
伏路傍暮去必率車乘重裝驍騎逐擊勢必莫當遇我
伏內如雪逢湯也

後漢書曰袁尚據鄴率兵往擊兄譚於南皮留蘇留審
配守曹公圍鄴尚還救鄴諸將皆以為此歸師人自為
戰不如避之公曰尚從大道來當避之若循西山來者
此成擒耳尚果循西山來臨滏水為營夜遣兵犯圍公
逆擊破走之城崩潰

通典曰東晉末武帝伐南燕慕容超領南賊盧循徐道
覆乘虛襲建鄴循多疑少決每欲以萬全為慮謂道覆
曰大軍未至晉吏部尚書孟昶便親引自裁大勢言之
事當計日潰亂令決負於一朝既非必定之道且殺傷
士卒不如案兵待之宋武奔還拒守策之曰賊若新亭
直上且當避之迴泊蔡州乃成擒耳於是登石頭城以
觀循軍初見引向新亭宋武顧左右失色既而迴泊蔡
州道覆猶欲上循使禁之羸老悉乘舟艦向白石宋武

慮其從白石步上乃率劉毅諸葛長民北出拒之賊遂率數萬屯丹陽郡宋武率諸軍馳歸衆慮賊過江咸謂當還還拒戰宋武乃先引軍還石頭衆莫之曉是日大熱三軍疲頓既入城解甲息士洗浴飲食久之乃出列陣于南塘命叅軍褚叔度朱齡石率驍勇千餘人過淮賊數千皆長刀矛鋌精甲曜日奮躍爭進齡石所領多鮮卑善步稍並結陣以待之賊短兵弗能抗死傷數百人乃退走

安衆

春秋曰晉文公卒將殯于曲沃出絳柩有聲如牛

如牛
吼聲

虛苟切

卜偃使大夫拜曰君命大事將有西師過軼我擊

之必大捷焉秦伯使孟明視等三將襲鄭晉師禦之于

穀而敗之

聲自柩出故曰君命也大事也卜偃聞秦密謀故因柩聲以正衆心

史記曰燕使騎劫代樂毅攻齊即墨齊將田單拒守乃

令城中人食必祭其先祖於中庭飛鳥悉翔舞城中下

食燕人恠之單復宣言曰神來下教我又令曰當有神

人為我師者有一卒曰臣可以為師乎因反走田單乃起引還東嚮坐師事之卒曰臣欺君誠無能田單曰子勿言也因師之每出入約束必稱神衆心乃安竟破燕軍

又曰秦二世初天下亂陳勝吳廣起兵於蕪欲收人心謀曰項燕為楚將數有功愛士卒楚人憐之或以為在今誠以吾衆為天下倡宜多應者

謂首號令

廣以為然乃行

卜卜者知其指意曰足下皆成功然足下卜之鬼乎

卜者

云事成有功然須假托鬼神乃可興起耳
故勝廣曉其意則為魚書狐鳴以威衆也

勝廣喜念鬼

曰此教我先威衆耳廼丹書帛曰陳勝王置所罾魚腹

中

罾音曾

卒買魚烹食得書已怪之矣又間令廣之次近所

旁叢祠中夜篝火狐鳴呼曰大楚興陳勝王

間謂竊令人行也密

於廣所次舍處旁側叢祠中謂之叢謂草木之
本蔚者也祠神祠也構謂結起也呼火故切

卒皆夜

驚恐朝日卒中往往指目勝廣因而號令衆遂從之

又曰高帝已封大功臣二十餘人其餘日夜爭功不決

未得行封帝在洛陽南宮從復道遙見諸將往往相與

坐沙中偶語張良曰陛下起布衣以此屬取天下今為天子而所封者蕭曹故人及親愛而所誅者皆生平所讐怨今軍吏計功以天下不足遍封此屬畏陛下不能盡封又恐見疑平生過失及誅故即相聚謀反耳帝憂曰為之奈何良曰帝平生所憎羣臣所共知誰最甚者帝曰雍齒與我故數常窘辱我我欲殺之為其功多故不忍良曰今急先封則人人自堅矣於是帝乃置酒封齒什方侯已而急趣丞相御史定功行賞羣臣皆喜曰

雍齒且為侯我屬無患矣

漢書曰李廣以郎中令將四千騎出右北平博望侯騫將萬騎與廣俱一道行數十里匈奴萬騎圍廣軍士皆恐廣乃使其子敢往馳之敢從數十騎直貫敵騎出其右而還曰敵兵易與耳軍士乃安

後漢書曰王郎起光武馳至下曲陽傳聞王郎兵在後從者恐及滹沱河候吏還白河水流漸漸音斯無船不可

濟官屬大懼光武令霸往視之霸恐驚衆欲且前阻水

還即詭曰冰堅可渡官屬皆喜光武笑曰候吏果妄語也遂前比至河河水亦合乃令霸護渡未畢數騎而冰解光武謂霸曰安吾衆得濟免者卿之力也霸謝曰此明公至德神靈之佑雖武王白魚之應無以加此

昔武王渡

孟津白魚躍入王舟

光武謂官屬曰王霸權以濟事殆天瑞也以

為軍正

晉書曰李矩守滎陽城劉聰將劉暢討矩奉牛酒詐降謀夜襲之兵士以賊衆皆有懼色矩令郭誦禱鄭子產

祠曰君昔相鄭惡鳥不鳴克胡夏羯何得過庭使巫揚
言東里有教當遣神兵相助將士聞之皆踴躍爭進乃
使誦選勇敢千人夜掩暢營獲鎧馬甚多斬首數千級
暢僅以身免

東里子
產所居

又曰劉裕討慕容超圍廣固城數月不拔或說裕曰昔
石季龍攻曹疑瞻氣者以為澠水帶城

澠音
通

非可攻拔

若塞五龍口城必自陷季龍從之而疑降慕容恪圍段
龕亦如之而龕降降後無幾又震開之今舊跡猶在可

塞之裕從其言於是城中男女患脚弱疾者大半時有
蒼鵝飛入帳座衆咸驚愕其將胡色曰鵝者我也敵人
歸我之徵衆大悅將攻城諸咸諫曰今往亡之日兵家
所忌裕曰我往彼亡吉孰大焉乃命悉登遂克平廣固
宋書曰嶺南賊盧循寇建業太祖擊破之走至彭蠡湖乃
悉力柵斷左里大軍至左里將戰太祖所執麾竿折幡
沉水衆並怪懼太祖笑曰往年霸舟之戰幡竿亦折今
者復然賊必破矣即攻柵而進循兵雖殊死戰弗能禁

諸軍乘勝奔之循單騎走所殺及投池水死凡萬餘人
納其降附宥其逼略遣劉籛孟懷玉輕車追之循收散
卒尚有數千人徑還廣州

又禿髮利烏孤載記曰呂纂伐來使倂檀拒之纂士卒
精銳進度三堆三軍擾懼倂檀下馬據胡牀而坐衆心
乃安與纂戰敗之斬二千餘級

崔鴻十六國春秋曰後趙石勒使將麻秋等伐張重華
於武威重華將謝艾曰乞假臣兵七千為殿下吞之重

華以艾為中堅將軍配步騎五千擊秋引師出臨武威
有梟鳥鳴於牙中艾曰梟邀也六博得梟者勝今梟鳴
牙中尅敵之兆於是進戰大破之斬首五千級

又曰後燕慕容寶遣將慕容賀麟率三萬餘人寇新市
甲子晦後魏道武進軍討之太史令晁崇奏曰昔紂以
甲子亡兵家忌不可出帝曰紂以甲子日亡周武不以
甲子日勝乎崇無以對帝遂進軍新市賀麟退阻泝水
依漸洳澤以自固

漸子廉切
洳而據切

甲戌帝臨其營戰於義臺

搗大破之

梁書曰庾域為華陽太守後魏軍攻圍南鄭時糧儲寡

少人情恟懼

恟許
供切

州有空倉數十所域手自封題指示

將士云此中粟皆滿足支二年但努力堅守衆心以安

虜退以功拜羽林監

又曰楊公則隨武帝大軍至新林公則自越城移屯領

軍府壘北樓與南掖門相對嘗登樓望戰城中遙見麾蓋

縱神鋒弩射之矢貫胡牀左右皆失色公則笑曰幾中

吾脚談笑如初


通典曰隋末李密據興洛倉破宇文化及還士卒皆疲
倦隋將王充欲乘其弊而擊之恐衆心不一乃假託鬼
神云夢見周公乃立祠於洛水上遣巫宣言公欲令今
僕射討李密當有大功否則兵皆疲死充兵多楚人故
妖言以惑之衆皆請戰遂破密

唐書曰高祖為山西河東撫慰大使行至太平關遇賊
數千人時所將兵少左右皆懼高祖謂之曰此烏合之

賊易與耳因率騎十二人出擊之所向皆靡衆情始定
世說曰魏武行役失汲道軍皆渴乃令曰前有大梅林
饒子甘酸可以解渴士卒聞之口皆水出乘此得及前
源

三國典略曰梁蕭藻有操行以父非命而卒布衣菲食
非公坐不聽音樂初為益州刺史時有焦僧護作亂掩
據郫繁衆有數萬藻年未弱冠將自擊之乃乘平肩輿
巡行賊衆流矢雨下從者舉楯以蔽藻命去之因是物

情大安賊夜遁梁武常稱其小字歎曰子弟並如迦葉
吾復何憂



太平御覽卷二百九十五

欽定四庫全書

子部

太平御覽卷

二百九十六至
三百二

詳校官侍讀學士

臣沈咸熙

員外郎

臣牛稔文覆勘

總校官降調編修

臣

倉聖脈

校對官檢討

臣

季學錦

謄錄監生

臣

李大任

欽定四庫全書

太平御覽卷一百九十六

律

李昉等撰

兵部二十七

法令

法令

孫子曰法者曲制官道主用也

曲制者部曲幡幟金鼓之制也官者百官之分

用也道者糧路也主用者主軍費用

卒未親附而罰之則不服不服則難

用也卒已親附而罰不行者則不可用也故合之以文
齊之以武是謂必取令素行以教其人也令素行則人
服令素不行則人不服令素行人服者與衆相得也厚
而不能使愛而不能令亂而不能理譬如驕子不可用也
左傳曰晉侯之弟揚干亂行於曲梁行軍次也魏絳戮其僕
僕御也晉侯怒謂羊舌赤曰合諸侯以為榮也揚干為戮
何辱如之必殺魏絳無失也赤對曰絳無二志事君不
避難有罪不避刑其將來辭何辱命焉言終魏絳至授

僕人書

僕晉侯御僕也

將伏劔士魴張老止之公讀其書曰日

君乏使使臣斯司馬臣聞師衆以順為武

順莫敢違

軍事有

死無犯為敬

守官行法守死不敢有失

君合諸侯臣敢不敬君師不

武執事不敬罪莫大焉臣懼其死以及揚干無所逃罪

懼自犯不武不敬

不能致訓至於用鉞

用鉞斬揚干之僕

臣之罪重敢

有不從以怒君心

言不敢不從戮也

請歸死於司寇

致死於司寇使戮也

公跣而出曰寡人之言親愛也吾子之討軍禮也寡人

有弟弗能致訓使干大命寡人之過也子無重寡人之

過

聽使死
為重過

敢以為請

請使
無死

晉侯以魏絳為能以刑佐民

矣反役與之禮食使佐新軍

今欲顯絳故
特為設禮食

史記曰齊景公時晉伐阿鄆

阿今濟陽郡東阿縣鄆
音緇今濮陽郡鄆城縣而

燕侵河上齊師敗績嬰乃薦司馬穰苴文能附眾武能

威敵齊景公召穰苴與語兵事大說之以為將軍將兵

扞燕晉之師穰苴曰臣素卑賤君擢之閭伍之中加之

大夫之上士卒未附百姓弗信人微權輕願得君之寵

臣國之所尊者以監軍乃可於是景公許之使莊賈往

穰苴既辭與賈約曰旦日日中會於軍門穰苴先馳至
軍立表下漏待賈賈素驕貴不甚急親戚送之畱飲日
中而賈不至苴仆表決漏入行軍勒兵申明約束約束
既定夕時而賈至穰苴曰何後期為賈謝曰不佞大夫
親戚送之故畱止苴曰將受命之日則忘其家臨軍約
束則忘其親援桴鼓之急則忘其身今敵國深侵邦
內騷動士卒暴露於境君不安席百姓之命皆懸於君
何謂相送乎召軍正問曰軍法後期者云何對曰當斬

遂斬莊賈以徇三軍三軍之士皆震慄晉師聞之為罷
去燕師聞之度水而解

又孫武以兵法見於吳王闔閭闔閭曰子之十三篇吾
盡觀之可以小試勒兵乎對曰可闔閭曰可試以婦人
乎曰可於是許之出宮中美人得百八十人孫子分為
二隊以王之寵姬二人為隊長皆令持戟令曰汝知爾
心與左右手背乎婦人曰知之武曰前則視心左視左
手右視右手後即視背婦人曰諾約束既畢乃設鐵鉞

即三令五申之於是鼓之右婦人大笑武曰約束不明
申令不熟將之罪也復三令五申而鼓之左婦人復大
笑孫子曰約束不明申令不熟將之罪也既已明而不
如法者吏士之罪也乃欲斬左右隊長吳王從臺上觀
見且斬愛姬大駭趣使使下令曰寡人已知將軍能用
兵矣寡人非此二姬食不甘味願勿斬也武曰臣已受
命為將將在軍君命有所不受遂斬隊長二人以徇用
其次為隊長於是復鼓之婦人左右前後跪起皆中規

矩繩墨無敢出聲者於是武使使報王曰兵已整王可試
下觀之惟王所欲用之雖赴水火無不可也王曰將軍
請就舍寡人不願下觀武曰王徒好其言不能用其實
於是闔閭知孫子能用兵卒以為將西破強楚入郢北
威齊晉

又文帝後六年匈奴大入邊乃以宗正劉禮為將軍軍
霸上祝滋侯徐厲為將軍軍棘門以河內守周亞夫為
將軍軍細柳以備胡上自勞軍直馳入將以下騎送迎

已而之細柳軍士吏卒被甲銳兵刃彀弓弩持滿天子
先驅不得入先驅曰天子且至軍門都尉曰軍中但聞
將軍令不聞天子詔居無何上至又不得入於是上乃
使持節詔將軍吾欲入勞軍亞夫乃傳言開壁門士卒
謂從車騎曰將軍約束軍中不得驅馳於是天子乃按
轡徐行至軍中營將軍亞夫持兵揖曰介冑之士不拜
請以軍禮見應劭曰禮介者不拜天子為動容軾車使人稱皇帝
敬勞將軍成禮而去既出軍門羣臣皆驚文帝曰嗟乎

此真將軍矣曩者霸上棘門軍若兒戲耳其將固可襲而虜也至於亞夫何得而犯耶稱善者久之

後漢書曰祭遵從征河北為軍市令舍中兒犯法遵格殺之光武怒命收遵主簿陳副諫曰明公常欲衆軍整齊今遵奉法不避是教令所行也光武乃貫之貫猶以赦也

為刺姦將軍謂諸將曰當避祭遵吾舍中兒犯法尚殺之必不私諸卿也

謝承後漢書曰張溫以司空加車騎將軍征韓遂丙辰

引溫見於崇德殿溫以軍禮長揖不拜

魏志曰曹仁字子孝少時不修行檢及長為將嚴整奉
法常置科於左右案以從事

吳志曰呂蒙圖雲長到南郡入城盡得將士家屬蒙撫
慰約令軍中不得干歷人家有所求取蒙麾下士是汝
南人取民家一笠以覆官鎧鎧雖公物蒙猶以為犯軍
令不可以鄉里故廢法垂涕斬之

晉書李特載記曰益州刺史趙廞以李庠為威寇將軍

使征北道庠素東羌良將曉軍法不用麾幟舉手為行
伍斬部下不用命者三人部陣肅然

蕭子顯齊書曰李安民為徐州城局參軍王廻素為安
民所親盜絹二疋安民流涕於門斬之厚為殮祭軍府
皆震服焉

北史曰後魏孝文車駕南征以宋弁為司徒東道副將
軍人有盜馬鞞者斬而徇於是三軍震懼莫敢犯法

又後魏安定王休車駕南伐領大司馬孝文親行諸軍

遇休以三盜人徇六軍將斬之有詔赦之休執曰不斬何以息盜詔曰王者之體亦有非常之澤雖違軍法可特原之休乃奉詔帝謂司徒馮誕曰大司馬嚴而執法諸軍不可不慎於是六軍肅然

唐書曰闕稜容貌魁岸勇而多力每臨陣手持大刀長一丈一舉輒斃數人前無當者及杜伏威據有江淮之地兵皆出自羣賊類多放縱有相侵奪者稜必殺之雖親故無所捨令行禁止路不拾遺後從伏威入朝拜左

領軍將軍輔公祐之反也稜從軍討之及與陳正通相遇方接戰稜脫兜鍪謂賊衆曰汝不識我邪何敢來戰其衆多稜舊之所部由是各無鬪志或有遙拜者賊師遂潰

又竇軌物入蜀將其甥從軍以為心腹嘗夜出呼之以時至因斬之將吏重足而立見之者莫不股慄

又哥舒翰好讀左氏春秋及漢書疎財重氣士多歸之河西節度王忠嗣以為大計軍副使安思順為大使翰

常怏怏不能下之忠嗣遂使翰別為將討吐蕃于新城以同戴副使為副副使不為翰用頗沮之翰怒甚脫甲搃殺之投尸於坑中軍中股慄

又馬燧討李懷光於河中帥步騎三萬次於絳乃分兵收下縣略稷山拔龍門降其將馮萬興任象王燧以兵圍攻絳州拔其外城其夜偽刺史王尅同與大將達奚小進棄城走降其衆四千人又遣大將李自良谷秀分兵略定聞喜夏縣萬泉虞鄉永樂猗氏六縣降其將辛

牂音及兵五千人谷秀以犯令擄士女斬之以徇

又德宗幸奉天詔以李晟為神策行營節度使晟軍令嚴肅所過樵採無犯自河中至蒲津而軍渭北進據東渭橋以逼朱泚時劉德信將神策兵救襄城敗於扈澗聞難率餘軍前次渭南與晟合軍軍無統一晟不能制德信因至晟軍晟乃斬之復以數騎入德信軍中撫勞軍士無敢動者晟既并德信軍軍益振

又李晟收復都城朱泚乃與妻子及姚令言張芝等數

千騎西走涇源餘兵靡散晟乃入據丹鳳門舍軍於外
朝晟處於右金吾伏舍下令曰軍中五日不得通家問
違者斬之遣京兆尹李齊運告諭於衆百姓安堵秋毫
無犯晟大將高明曜擄賊女妓一人司馬伯_音取賊馬
二匹晟立斬之軍士皆脅息莫敢仰視翌日晟以露布
聞上覽之感泣百官皆出涕因上壽稱萬歲曰李晟虔
奉聖謨盪滌凶慝然古之樹勲力復都邑者徃徃有之
至於不驚宗廟不易市肆長安人不識旗鼓安堵如初

三代以來未之有也上笑曰天生李晟為社稷萬民不為朕也百官再拜而退

又永貞元年冬劉闢阻兵朝議討伐宰臣杜黃裳以為獨任高崇文可以成功元和元年拜檢校工部尚書兼御史大夫充左神策行營節度使兼統左右神策奉天鱗遊諸鎮兵討闢時宿將專征者甚衆人人自謂當選及詔出大驚崇文在常武練卒五千常若寇至及是中使至常武卯時宣命而辰時出師五千器用無缺者軍

至興元軍中有折逆旅之匕箸者斬之以徇從閭中入
遂却劔門之師解梓潼之圍

又高崇文平劉闢王師入城介士屯於大造軍令嚴肅
珍貨山積市井不移秋毫無犯

又郝士美為招義節度使朝廷討王承宗士美遣兵馬
使王獻領卒一萬為前鋒獻凶惡恃亂逗撓不進遽令
召至數其罪斬之下令曰敢後出者斬士美親鼓之兵
既合而賊軍大敗下三營還柏鄉屢以捷聞上大悅曰

固知士美之能辦吾事於時四面七八鎮兵共十餘萬以環鎮冀未有首功多犯法士美兵勇敢畏法聲甚震承宗大懼指期有破亡之勢會詔班師至今兩河間稱之

又李師道攻徐徐將王智興敗賊壁獲美妾智興懼軍士爭之乃曰軍中有女子安得不敗此雖無罪違軍法也即斬之以徇

韓子曰吳起為魏侯西河之守奏有小亭臨境吳起欲

攻之乃倚車轅於北門外而令之曰有能徙此南門之外賜之上田上宅民莫之徙也或有徙之者遂賜之如令俄又置一石委之於東門之外而令之曰有能徙之於西門之外者賜之如初民則爭徙之乃下令曰明日攻亭有能先登者賜之國大夫賜之上田上宅民爭上於是攻亭一朝平之

尉繚子曰古之善用兵者能殺卒之半其次殺其十三其下殺其十一殺其半者威立海內殺其十三者力加

諸侯其十一者令行士卒故曰百萬之衆不鬪不如萬人之尸萬人之死不如百人之賊賞明如日月信行如四時令嚴如斧鉞卒有不死者未嘗聞也

六韜曰武王問將何為威太公曰殺一人萬人懼者宜殺之殺一人三軍不知雖多殺其將不重也

淮南子曰勾踐決一獄不辜投龍淵而切其股血流至足故戰武士必死

魏武軍令曰兵欲作陣對敵當先整伍乃引兵就長而

陣皆無誼譁明聽鼓音旗旂麾前則前麾後則後麾左則左麾右則右不聞令而擅前後左右者斬伍中有不進者伍長殺之伍長不進什長殺之什長不進部下殺之督戰部曲將拔刃在後察違令不進者斬之一部受敵餘部有不進救者斬之

武侯兵法曰軍有七禁一曰輕二曰慢三曰盜四曰欺五曰背六曰亂七曰誤此治軍之禁也若期會不到聞鼓不行乘寬自畱迴避務止初近而後遠喚名而不應

軍甲不具兵器不備此謂輕軍有此者斬之受命不傳
傳之不審以惑吏士金鼓不聞旌旗不覩此謂慢軍有
此者斬之食不廩糧軍不部兵予賜不均阿私所親取
非其物借貸不還奪人首級以獲功名此謂盜軍有此
者斬之變易姓名衣服不鮮金鼓不具兵刃不利器仗
不堅矢不着羽弓弩無絃主者吏士法令不從此謂欺
軍有此者斬之聞鼓不行鳴金不止按旗不伏舉旗不
起指麾不隨避前在後縱發亂行折兵弩之勢却退不

關或左或右扶傷舉死因託歸還此謂背軍有此者斬
之出軍行將士卒爭先紛紛擾擾軍騎相連咽塞道路
後不得前呼喚誼譁無所聽聞失行亂次兵刃中傷長
將不理上下縱橫此謂亂軍有此者斬之屯營所止問
其鄉里親近相隨共食相保呼召不得越入他位干誤
次第不可呵止度營出入不由門戶奸邪所起知者不
告罪同一等合人飲酒阿私所受大言驚語疑惑吏士
此謂誤軍有此者斬之

衛公兵法曰古之善為將者必能十卒而殺其三次者
十殺其一三日威振於敵國一日令行於三軍是知畏
我者不畏敵畏敵者不畏將盡忠一時輕生重節者雖
讐必賞犯法怠惰敗事貪財者雖親必罰伏罪輸情實
直敦素者雖重必捨遊辭巧飾虛偽狡詐者雖輕必戮
善無微而不賞惡無纖而不貶斯乃勵衆勸功之要術
也昔馬謖兵敗孔明對泣而誅鄉人盜笠呂蒙流涕而
斬馬逸踐麥曹操割髮而自刑兩椽辭屈黃蓋詰問而

俱戮故知威克其愛雖少必濟如愛勝其威雖多必敗
蓋賞罰不在重在必行不在數在必當

尉繚子曰吳起與秦人戰陳尚未合有一夫不勝勇怒
而前獲首級而返吳起斬之吏曰此壯士也不可斬吳
子曰雖壯士不從令必斬之

又秦旗斬將陷陣摧鋒上賞破敵所得資物僕馬等並
給戰士每收陣之後裨將虞候輩收歛付總管均分之
與敵鬪旗頭被傷救得者重賞漏泄軍情斬之背軍逃

走者斬之後期者斬之

有故不坐

行列不齊旌旗不整金革

不鳴斬之與賊私交通斬之

言語書疏並同

或說道釋祈禱鬼

神陰陽卜筮灾祥訛言以動衆心并與其人往還言議

斬之無故驚軍叫呼奔走謬言烟塵斬之凡令覘候或

更相推托謬說事宜兼復漏泄者斬之吏士所經歷侵

掠者斬之奸人妻女及將婦女入營者斬之不戰而降

敵沒其家凡有私讐須先言令其避仇若不言因戰陣

報復者斬之佈陣旗亂吏士驚惶罪在旗頭斬之陣定

或輒進退或對敵亂行者前後左右所平之行便斬之
或有弓弩已注矢而迴顧者或干行失位者後行斬之
前行不動行斬于失之行守圍不固一火及主吏並斬
之遇敵攻圍危急若前後左右部隊不救至陷者全部
隊皆斬之為敵所乘失旗鼓鉞者全隊斬之陣之旗
頭被敵殺爭得屍首免坐不得者一旗並斬之凡戰敵
失主將隨從者皆斬之一將遇敵裨將之下等差率不
齊力同戰更相救助者任便斬之吏士雖破敵濫行殺

戮發塚焚廬踐稼穡伐樹木者斬之擒獲敵人或有來
降者直令見總帥不得輒詢問敵中之事若因違而以
漏泄者斬之破敵先擄掠者斬之入敵境同凡隱欺破虜所
收獲及吏士身死有欺隱其資物兼違令不收恤者斬
之違總帥一時之令者斬之

太平御覽卷二百九十六

欽定四庫全書

太平御覽卷二百九十七

宋 李昉等 撰

兵部二十八

訓兵

訓兵

孫子曰言不相聞故為鼓鐸視不相見故為旌旗夫金鼓旌旗者所以一人之耳目也人既專一則勇者不

得獨進怯者不得獨退紛紛紜紜間亂而不可亂

旗

亂也示敵若亂以金間之紛紛旌旗翻轉一合一離士卒進退或往或來視之若擾觀之若亂然其法令素定度職分明各有分數擾而不亂也 渾渾沌沌形圓而不可敗

車騎齊轉也形圓者

出入有道齊整也渾渾車輪轉行沌沌步騎奔馳視其形陣縱橫圓而不方然其指趣各有所應故王子曰將欲內明而外暗內理而外渾示敵之輕已者也渾音分本切沌從損切

周禮曰大宗伯以軍禮同邦國

同謂威其不協偕差者軍禮之別有五

大

師之禮用衆也

用其義勇也

大均之禮恤衆也

均其地政地守地職之賦

所以憂民也

大田之禮簡衆也

古者因田習兵閱其車徒之數也

大役之禮

任衆也

禁宮邑所以事民力強弱也

大封之禮合衆也

正封疆溝洫之固所以合

聚其民也

又曰夏官大司馬之職掌中春教振旅司馬以旗致民
平列陳如戰之陳以教坐作進退疾徐疏數之節遂以
蒐田中夏教茆舍如振旅羣吏撰車徒遂以苗田中秋
教治兵如振旅辨旗物之用遂以獮田中冬教大閱前
期羣吏聽誓於陳前斬牲以左右徇陳曰不用命者斬
之遂以狩田師以救無辜伐有罪若師有功則左執律

右秉鉞以先愷樂獻於社

左傳曰春蒐夏苗秋獮冬狩皆於農隙以講事也三年而治兵入而振旅歸而飲至以數軍實昭文章明貴賤辨等列順少長習威儀也

又曰楚子文治兵於暌終朝而畢不戮一人子玉復治兵於蔿終日而畢鞭七人貫三人耳國老皆賀子文為賈不賀曰子玉剛而無禮過三百乘其不能以入矣子玉之敗子之舉也舉以敗國將何賀焉

又曰苗賁皇徇曰蒐乘補卒秣馬利兵修陣固列蓐食
申禱明日復戰乃逸楚囚

又曰宣子曰我若受秦則賔也不受寇也既不受矣而
復緩師秦將生心先人有奪人之心軍之善謀也逐寇
如追逃軍之善政也訓卒利兵秣馬蓐食潛師夜起戊
子敗秦師於令狐至於劓首

又曰宣榭火

宣榭講武室也

論語曰子曰善人教民七年亦可以即戎矣

可就兵攻戰也

又曰以不教民戰是謂棄之

後漢書曰靈帝時望氣以為京師有大兵兩宮流血大將軍司馬許涼假司馬伍宏說何進曰太公六韜有天子將兵事可以威四方進以為然入言之于帝于是講武於平樂觀下起大壇建十二重五采華蓋帝躬操甲介馬稱無上將軍使進領兵屯於觀下置西園八校尉袁紹曹操等為之

唐書曰太宗初即位突厥入寇欲諸軍皆習騎射每退即引諸衛將習射於顯德殿庭謂將軍已下曰古突厥

與中國更有盛衰若軒轅善用五兵即能北逐獯虜周
宣驅駕方召亦能制勝太原下至漢晉之君洎于隋代
不使兵士素習干戈突厥來侵莫能抗禦遣中國生民
塗炭于寇手我今不使汝等穿地築苑造諸淫費農民
恣令逸樂兵士唯習弓馬若無賊來我則為汝博士教
汝等武藝優長若有賊來我則為汝將帥令汝等鬪戰
亦望使汝等前無橫敵於是日引數百人於殿庭教射
太宗親自令試每坐或至午時射中者隨賞弓刀布帛

統帥加上考朝臣咸諫云不宜引卑賤之人挾弧矢於
軒陛之側上曰率土之內皆吾臣子我所恨不能將我
心遍置人腹中豈有相疑之道哉由是一二年間兵士
盡便弓矢焉

又曰李抱真領澤潞觀察畱後抱真密揣山東當有變
上黨且當兵衝是時承戰餘之地土瘠賦重人益困無
以養軍士乃籍戶丁男三選其一有材力者免租徭給
弓矢令之曰農之隙則分曹角射歲終吾當會試及期

按簿而徵之明試以示賞罰復命之如初比三年則皆善射抱真曰軍可用矣於是舉部內之衆得精卒二萬人既不費廩府庫益實乃繕甲兵為戰具遂雄視山東是時稱昭義步兵冠諸軍

又曰德宗即位以馬燧為太原尹北都留守河東節度觀察度支營田使當是時太原承鮑防敗軍之後兵甲寡弱騎士少燧乃悉召將吏牧馬廝役得千數人悉補騎卒教之數月皆為精騎造甲者必令長短三等稱士

所衣以便進趨又造戰車以象狻猊列戟於後行則載兵甲止則為營陣或塞險阨以遏奔衝器械無不犀利居一年陳兵三萬開廣場以習戰陣教其進退

古司馬兵法曰凡戰非陣之難使人可陣難非可使陣

難使可用難

使人盡心効力用必勝也

非知之難行之難

教習使人知進退之

便左右之利自
事事行之者難

又曰天子之義必純取於天地而觀於先聖

天子奉天地之道調

和陰陽四時之氣
順先王之法度也

士庶之義必奉於父母而正於君臣

士庶必從父母之教君長之命故雖有明君士不先教不可用也

雖有明君士不

教習不可受敵也古之教民必立貴賤之經綸使不相凌德義

不相踰材藝不相掩勇力不相犯故力同意和古者國

容不入軍軍容不入國故德義不相踰

治國以仁德軍士以勇義德以

從化義以法斷以國容入軍則軍敗以軍容入國則國亂

吳起教戰法曰短者持矛戟長者持弓弩强者持旌旗

勇者持金鼓弱者給廝養智者為謀士鄉里相比什伍

相保一鼓整兵二鼓戢陣三鼓趣食四鼓辨列五鼓就

行聞鼓聲合然後舉旗

六韜曰教戰之法必明告吏士三令五申教其操兵起居進止旌旗指麾陣而方之坐而起之行而止之左而右之列而合之繩而解之無犯進止之節無失飲食之宜無絕人馬之力令吏士一人學戰教成十人十人學戰教成百人百人學戰教成千人千人學戰教成萬人萬人學戰教成三軍之衆大戰之法百萬之師故能成大功也

衛公兵法曰諸兵士將戰身貌尪弱不勝衣甲及戎具
所施理須簡取強兵并令試練器仗兵須徹扎陷堅皆
須取甲令試所射然始取中

又曰每營中兩廂置土馬十二疋大小如常馬真鞍令
士卒擐甲冑繫弓矢藥音高佩刀劍持矛楯左右上下以

便習事

又教旗法曰凡教旗于平原曠野登高遠視處大將居
其上南向左右各置鼓一十二面角一十二具左右各

樹五色旗六纛居前列旗節次之左右衙官駐隊如偃月形為後騎下臨平野使士卒目見旌旗耳聞鼓角心存號令乃命諸將分為左右皆去兵刃精新甲冑幡幟分為左右廂各以兵馬使為長班布其次陣間容陣隊間容隊曲間容曲以長參短以短參長迴軍轉陣以後為前以前為後進無奔迸退無趣走以正合以奇勝以聽以觀乍合乍離於是三令五申白旗點鼓音動則左右廂齊合朱旗點角音動則左右廂齊離離之與合皆

不離中央之地左廂陽向西旋右廂陰向東旋左右皆復本初白旗掉鼓音動左右各雲蒸鳥散彌川絡野然不失隊伍之疎密朱旗掉角音動左右各復本初前後左右無差尺寸散則發天聚則法地如此三合而三離三聚而三散不如法者吏士之罪從軍令於是大將軍出五采旗一十二口各樹於左右廂陣前每旗命壯勇士五十人守旗選壯勇五十人奪旗左廂奪右右廂奪左鼓音動而奪角音動而止得旗者勝失旗者負勝賞

而負罰離合之勢聚散之形勝負之理賞罰之信因是而教之

太白陰經曰春秋末並為戰國增講武之禮以為戲樂以相誇視而秦更名為角抵故國雖大好戰必亡天下雖平忘戰必危天下既平春蒐秋獮振旅理兵所以不忘戰今邊軍更名曰教旗使士卒識金鼓別旗幟任行列知部分一軍之節制也

又曰古之諸侯畋獵者為田除害也上所以供奉宗廟

下所以嫻習武事太古之時人食禽獸之肉坐其皮後
代之人浸多時禽獸寡少衣食不足於是神農教其植
穀導以紡績自是之後禽獸復盈山林下平土害禾稼
為人所害於是王公秋冬無事畋獵嫻習兵革奮揚威
武以戒非常季冬之月臘日陰用事萬物畢成蟄蟲已
伏乃具卒乘從禽於山澤以教部分進退之儀一人守
圍地三尺十二時守三萬六千尺積尺得六千部積部
得十五里餘六十部圍中徑闊得地五里餘二十部以

左右決勝將軍為交頭其決勝左右將各主士忤為行列皆以金鼓旌旗為節制其初起圍張翼隨山林地勢無近遠部分其合圍地虞候先擇定訖以善弧矢者為圍中騎其步卒搶旗幟守圍者漏禽獸坐守圍之吏大獸公之小獸私之以觀進止

管子曰涼風至而白露下天子命左右司馬令組甲厲衆士

商君書曰民之見戰如餓狼之見兔則民可以用矣

呂氏春秋曰世有言曰驅市人而戰可以勝人之厚祿

教練卒攻罷民

罷與疲同

可以勝人之精士練才離散係叅

音累

可以勝人之行陳

陳與陣同

整齊鉏耰白挺可以勝人之

長銚利兵此不通乎兵者之論今有利劍於此以刺則

不中以擊則不及於惡劍無擇為是關因用惡劍則不

可簡選精良兵械鋒利發之則不時縱之則不當與惡

卒無擇為是戰因用惡卒則不可王子慶忌陳午猶欲

劍之利也

陳午齊人慶忌吳公子二人皆勇有健力

簡選精良兵械銛利令

將將之有以王者霸者矣湯武齊桓晉文吳闔閭是也
又曰故形勢險阻欲其便也兵甲器械欲其利也選練
角材欲其精也將率士民欲其教也此四者義兵之助
也時變之應也

又曰闔閭試其民於五湖劍皆加於肩地流血幾不可
止勾踐試其民於寢宮民爭入火死者千餘遽擊金而
退之賞罰充實也

鄴城故事曰凌霄觀按石季龍永和三年命其子石宣

祈于山川因而遊獵乘大輅羽葆華蓋建天子旌旗六十有軍戎卒十八萬出自金明門季龍從後宮昇觀望之笑曰我家父子如是自非天崩地陷當復何愁但抱子弄孫日為樂耳

文選曰三令五申教達禁戒

謝承與步子山書曰示攻戰進取之方教進退疾徐之節

劉向別傳曰楚鞠者傳言黃帝所作或曰起戰國之時

踰音鞠兵勢所以陳之知武材也皆因嬉戲而講習也

太平御覽卷二百九十七

欽定四庫全書

太平御覽卷二百九十八

宋 李昉等 撰

兵部二十九

軍制

偏將

軍制

禮記曰六十不預服戎師出不踰時為怨思也踰時即
內有怨女外有曠夫

周禮曰五人為伍五伍為兩四兩為卒五卒為旅五旅

為師五師為軍

鄭玄曰兩二十五人卒百人旅五百人師二千五百人軍萬二千五百人也

後漢書光武紀曰建武元年二月赦天下賜民爵一級年

八十復二算九十復甲卒

張晏注曰復甲卒不預革車之賦也

白虎通曰王命法三十受兵六十歸兵國有三軍所以

備非常伐無道尊宗廟重社稷安不忘危何以言有三

軍也論語云子行三軍則誰與詩云周王于邁六師及

之三軍者何法法天地人也以為五人為伍五伍為兩

四兩為卒五卒為旅五旅為師五師為軍二千五百人為師萬二千五百人為一軍三軍三萬七千五百人也傳曰一人必死十人不能當百人必死千人不能當千人必死萬人不能當萬人必死橫行天下雖有萬人猶讓讓不以自足故復加五千人因法月數月羣陰之長也十二月足以窮盡陰陽備物成功萬二千人亦足以征伐不義致天下太平

穀梁傳曰天子六軍諸侯上國三軍次國二軍下國一

軍諸侯所以一軍者何諸侯藩屏之臣也任兵革之重距一方之難故得有一軍也

淮南子曰季武子為三軍

為作也武子魯卿季文子之子季孫宿也周禮天子六軍

諸侯大國三軍魯伯禽之封舊有三軍其後削弱二軍而已武子欲專公政故欲益中軍為三三家各有其一
事在魯襄公十一年叔孫穆子曰不可天子作師公帥之以征不

德師謂六軍之東公謂諸侯為王卿士者為元帥也

元侯作師卿帥之以承天

子元侯大國之君師三軍之東大國三卿皆命於天子一卿命於其君無軍無三軍也若元侯有事則命卿

帥其所教武衛之士以佐元侯禮所云次國二軍小國一軍謂以賦出軍從征伐贊佐治也
自伯子

男有大夫無卿

無卿無命卿也王制小國二卿皆命於其君也

帥賦以從諸侯

賦國中出兵車甲士以從大國諸侯

是以上能征下無姦慝

征正慝惡

今我小

侯也

言小侯削弱之日久矣

處大國之間

大國齊楚也

繕貢賦以供從

猶懼有討

猶懼以不給見誅討

若為元侯之所為

之所為謂作三軍元侯所為

以怒大國無乃不可乎弗從遂作中軍

中者明已

自是

齊楚代討於魯

更代

襄昭皆如楚

襄公昭公如楚朝事楚也

穰苴兵法曰五人為伍十五為隊一軍凡二百五十人

隊餘奇兵隊七十有五以為中壘守地六千尺積尺得

四里以中壘四面乘之一面得地三百步壘內有地三頃餘百八十步正門為握奇大將軍居之六纛五麾金鼓府藏輜積皆中壘外餘八千七百五十人隊一百七十五分為八陣六陣各有一千九十四人六陣各減一人以為二陣之部署舉一軍則千軍可知凡兵者有四正四奇或合而為一或離而為八陣故以正合以奇勝

通典曰每軍大將一人

別奏八人
僚十六人

副二人

分掌軍務奏
僚減大將半

判官二人典軍四人總管四人

二主左右虞候二主左右押衙僚各五人在衙

官子將八人委其分行陣辦金鼓及部署僚各二人執鼓十二人吹角十

二人司兵司倉司驛司曹城局各一人每隊五十人押

官一人隊頭一人副二人旗頭一人副二人火長五人

六分支甲四分支
戰袍一分支鎗

又周禮萬有二千五百人為軍軍將皆命卿二千有五

百人為師師帥皆中大夫五百人為旅旅帥皆下大夫

百人為卒卒長皆上士二十有五人為兩兩司馬皆中

士五人為伍伍皆有長軍師旅卒兩伍皆衆名也伍一比兩一間卒一族旅一黨師一

州軍一鄉家所出一人按司馬法二十五人為兩四兩為卒百人也五卒為旅五百人五旅為師二千五百人五師為軍一萬二千五百人萬二千象十有二月五百象閏

管子謂齊桓公曰欲正卒伍修兵甲則大國亦將為之君

若有征戰之事則小國有守圉之備矣公欲速得意於

天下諸侯則事有所隱而政有所屬

不顯習於兵事故曰事有所隱軍陣

屬之田獵故有所屬

公作內政而屬軍令焉三分齊國為高子之

里為國子之里為公之里以為三軍擇其賢民使為里

君

每里皆使賢者為君

鄉有行伍卒長則有制令且以田獵因以

賞罰

因田獵之功過期行賞罰

則百姓通於軍事矣於是乃制五家

以為軌軌為之長十軌為里里有司四里為連連為之

長十連為鄉鄉有良人以為軍令是故五家為軌故五

人為伍軌長率之十軌為里故五十人為小戎里有司

率之四里為連故二百人為卒連長率之十連為鄉故

二千人為旅鄉良人率之三軍故有中軍之鼓

中軍則公之里

卒有高國之鼓春以田曰蒐振旅

因屬軍政而且整旅

秋以田曰

獮理兵

順殺氣因理兵

是故卒伍定於里軍政定於郊內教既

成令不遷徙故伍之人與人相保家與家相受少同居長同遊祭祀同福死喪相恤灾禍同憂居處同樂行作同和哭泣同哀是故夜戰其聲相聞足以相親晝戰則其目相見足以相識歡欣足以相死是故以守則固以戰則勝君有此教士三萬人以橫行於天下

教士謂先教習

之士也誅無道以定周室天下大國之君莫之能圍也

又曰凡立軍一人曰獨二人曰比三人曰參比參曰伍

伍人為列

列有頭

二列為火

十人有長立火字

五火為隊

五十人有頭

二隊為官

百人立長

二官為曲

二百人立候

二曲為部

四百人立司馬

二

部為校

八百人立尉

二校為裨

千六百人立將軍

二裨為軍

三千二百人有

將軍副將軍

唐書曰高祖起義兵命太宗將兵徇西河郡下之癸巳

建大將軍府以裴寂為長史劉文靜為司馬具設官屬

始置三軍分為左右以公子建成為隴西公左領大都

督左三軍將軍悉隸焉命太宗為燉煌公右領大都督

右三軍將軍悉隸焉開倉庫以賑窮乏遠近嚮應

又高祖二年秋七月壬申詔曰天生五材百物資其器
用武有七德撥亂所以定功故黃帝垂裳尚有阪泉之
戰放勳光宅猶稱丹浦之師禁暴安人率由茲道創業
垂統莫此為先以是周置六軍每習蒐狩漢增八校畢
選勇能故化行九有威震百蠻奸宄不興虔劉息志李
葉凌替軍政湮亡卒伍不修旌旗舛雜部伍符籍空有
調發之名竟無討襲之用遂使夷狄放命盜賊交侵爭
戰多虞黔黎殄喪朕受天明命撫有萬方爰自義師克

成帝業至如超乘之士莫匪百金穀騎之材豈唯七萃
今雖關塞寧謐荒裔肅清伊洛猶蕪江湖尚梗役車未
息戎馬載馳武備之方猶宜精練所以各因部校序其
統屬改授旗鼓創造徽章取象天官定其名號庶使前
矛後勁類別區分玉帳絳宮威德充備蹈茲湯火譬彼
椒蘭大定戎衣止戈斯在於是置十二軍分關內諸府
以隸焉萬年道為參旗軍長安道為鼓旗軍富平道為
玄武軍醴泉道為井鉞軍同州道為羽林軍華州道為

騎官軍寧州道為折威軍岐州道為平道軍幽州道為招搖軍西麟道為苑游軍涇州道為天紀軍宣州道為天節軍時高祖以天下未定實資武力將舉關中之眾以臨四方故出此制也每軍一人副一人取威名素重者為之督以耕戰之務自是士馬精強無敵於天下矣五代周史曰顯德初世宗自高平還乃大閱武士帝親臨之帝自高平之役觀諸軍未甚嚴整遂有退却至是命太祖皇帝一槩簡閱選武藝超絕者署為殿前諸班

因是有散員散指揮內殿直散都頭鐵騎控鶴之號復命總戎者自龍捷虎捷以降一一選之老弱羸小者去之軍士步伍無不精當由是兵甲之盛近代無比

偏將

尚書曰司馬掌邦政統六師平邦國

左傳曰趙朔趙嬰齊為中軍大夫鞏朔趙穿為上軍大夫荀息趙同為下軍大夫韓厥為司馬

又晉侯請於王戊申以散冕命士會將中軍且為太傅

於是晉國之盜逃奔於秦

又楚子北師次於延沈尹將中軍子西將左子反將右將飲馬於西河而歸

又魯宣公十年夏六月晉師救鄭荀林父將中軍先軫佐之士會將上軍郤克佐之趙朔將下軍欒書佐之

公羊傳曰秋衛師入盛昌為或言帥師或不言帥師將尊師少稱將將卑師衆稱師

論語曰王孫賈治軍旅奚其喪

衛靈公之無道得賈尚不喪也

史記項羽本紀曰於是梁為會稽守籍為裨將

又項王召宋義與計事而大悅因以為上將項羽為魯公范增為末將

又灌嬰傳曰嬰擊陳豨受詔別攻豨丞相侯敞斬敞及

特將五人

文頴注云特一之將

後漢書西域傳曰大秦國一名犁鞬所治城周百餘里各有官曹文書置三十六將皆會議國事

晉書曰張光字景武江夏鍾武人也身長八尺明眉目

美聲音少為郡吏家世有部曲以牙門將伐吳有功遷
江夏西部都尉

又羊祜在軍常輕裘緩帶身不披甲鈴閣之下侍衛者
不過十數人而頗以田漁廢政常欲夜出軍司徐徹執
檠當營門曰將軍都督萬里安可輕出將軍之安危亦
國之安危也徹今日若死此門乃開祜改容謝之蓋此
後稀出矣

又吳彥為小將吳大司馬陸抗奇其勇略將拔用之患

衆情不允乃會諸將密使人佯狂拔刀跳躍來坐諸將皆懼而走惟彥不動舉凡拒之衆服其勇乃擢用焉

又天文志曰太白為上將羽林為中軍

又文昌六星在北斗魁前天府也一曰上將建武威二曰次將尚書中書司吏賞功也

又郎將位北主閱旗所以為武備也

又畢八星主邊兵戈其大星一曰天高二曰邊將

又參白獸之體其中三星橫列三將也北曰左眉主左

將西北曰右肩主右將故皇帝占參應七將七將大天
下兵精

又南三星騎陣將軍騎將也南三星車騎車騎之中將
也

又狼一星在東南狼為野將主侵掠也色有常欲不動
也

後周書曰賀拔岳事爾朱榮以定策功授前將軍時万
俟醜奴僭稱大號關中騷動朝廷深以為憂榮將岳討

之岳私謂其兄勝曰醜奴擁秦隴之兵足為勦敵若岳往而無功罪立至假使克定恐讒慝生焉勝曰汝欲何計自安岳曰請爾朱氏一人為元帥岳副帥之則可矣勝以為然乃請於榮榮大悅即以天光為雍州刺史以岳為衛將軍左都督

隋書曰大業九年徵天下兵募民為驍果置折衝果毅武勇雄武等郎將官以領驍果

唐書曰李質者汴之牙將李叡既為畱後倚質為心腹

及朝廷以介為郡守介志邀節鉞質勸不從會介疽發
質乃與監軍姚文壽謀斬介傳首京師有詔以韓充鎮
汴充未至質權知軍州事使衙兵二千人皆日給酒食
物力為之損屈充將至質曰若韓公始至頓去二千人
日膳人情必大去若不除之後必無繼斷不可畱此弊
以遺吾帥遂處分停日膳而後迎充

太平御覽卷二百九十八

欽定四庫全書

太平御覽卷二百九十九

宋 李昉等 撰

兵部三十

練士

兵衆

隊伍

練士

通典搜才

凡為將統戎在知士之器局當設科目差等優異應機而任以收其效

曰選士之

說者能往來聽言語覽視四方之事軍中之情偽日列
於前者能得敵人之主佐門廬請謁之情堪間諜者能
知山川險易行止形勢利害遠近井泉水草逕路迂直
堪鄉導者巧思出人製造五兵及攻守器械者引彊徹
扎戈鋌劍戟便於利用挺身捕虜奪旂斬將堪陷陣
者趨捷若飛踰越城塹出入無形堪窺覘者往返三百
里不及暮至者破格舒鉤或負六百斤行五十步四百

斤行百步者推步五行瞻風雲氣候轉式多言天道詭

說陰陽者

此雖非兵家本事所要資權譎以取勝耳

罪犯者父子兄弟破執

譬者貧窮忿怒將欲快其志者故贅聾入虜欲昭迹揚名者

長短經曰夫王者帥師必練簡英雄知士高下因能授職

各取所長為其股肱羽翼以伸威神然後萬事畢矣腹

心一人

主理繁應卒揆天消變總撮計謀保國全命者也

謀士五人

主國安危謀慮未然

論才能明賞罰受官位決嫌疑定可否者也

天文三人

主占星厯候風氣理時日考効驗占灾異

知天心去就者也

地利三人

主軍行止形勢利害遠近險易水澗山阻而不失地利者也

兵

法九人

主謀論異同行事成敗練簡兵器凡軍陣所用利于兵法者也

通糧四人

主廣

密蓄積通糧道致五穀令三軍不乏食用也

奪威四人

主擇才士諭兵馬風流電掣不識所由奇

狀鼓旂三人

主佐旂鼓傳宣號令倏忽往來出入若神

股肱四人

主出旂節任重持難

修溝塹治壁壘回轉守禦者

通才三人

主拾遺補過集會術數周流並會應待賓客議論談語爭

息結權士三人

主奇譎殊異非人所識行無窮之變也

耳目七人

主往來聽言語

覽視四方之事軍中之情偽日列於前也

爪牙五人

主揚威武激厲三軍冒難死攻正令三軍勇猛也

羽翼四人

主飛名譽震遠近動移四境以弱敵之心也

游士八人

主伺微祥候開

間視敵人為謀者也

偉士二人

主為諸詐依托鬼神以惑敵心

法算二人

主計會三

軍令理
萬物也

方士二人

主為藥以
全傷病也

軍中有大勇敢死樂傷者

聚一為卒

名曰胃
將之士

有勃氣壯勇強暴者聚一為卒

名曰
陷陣

之士有學於長劍彌弧接武齊列者聚為一卒

名曰銳
奇之士

有

破格舒鉤強梁多力能潰破金鼓絕滅旂旌者聚為一

卒

名曰勇
力之士

有能踰高超遠輕足善走者聚為一卒

名曰
寇兵

之士有故王臣失勢欲復見其功者聚為一卒

名曰死
聞之士

有

死事之人昆弟為其將報讐者聚為一卒

名曰死
責之士

有貧

窮忿怒將快其志者聚為一卒

名曰必
死之士

有故贅聾入虜

欲昭迹揚名者聚為一卒

名曰厲
頻之士

有辯言巧辭善毀譽

者聚為一卒

名曰間諜飛
言弱敵之士

有故激厲免罪之人欲逃其

恥者聚為一卒

名曰幸
用之士

有才伎過人能負重行百里者

聚為一卒

名曰待
令之士

夫卒強將弱曰陲

音豕

吏強卒弱曰陷

兵無選鋒曰北必然之勢矣故曰兵衆勢強士卒熟練

知之者勝不知之者不勝不可忽也

兵衆

書曰如虎如貔如熊如羆於商郊

又曰用咸戒於王曰王左右常伯常任準人綴衣虎賁
詩曰予王之介牙予王之介士

周禮曰司戈盾掌戈盾之物而頒之軍旅會同授貳車
戈盾建乘車之戈盾授旅賁及虎士戈盾

左傳曰彤弓虎賁文公受之以有南陽之田

又曰組甲三千被練三百

史記曰蘇秦說惠王曰以韓卒之勇被堅甲帶利劍一
人當百夫以韓之勁與大王之賢乃西面事秦為天下笑

漢書晁錯云陛下又興數十萬之衆以誅數萬之匈奴以衆寡計之以十擊一之術也

後漢書光武紀曰伯升拔宛已三日而世祖尚未知乃偽使持書報城中云宛下兵到而陽墮其書尋邑得之不意諸將既累捷膽氣益壯無不一當百

後漢書曰光武起王莽遣大司徒王尋大司空王邑王莽

時哀章所獻金匱圖有王尋姓名王邑王商子於莽為從父兄弟也將甲百萬其甲士四

十二萬人五月到潁川復與嚴尤陳茂合潁川郡今洛州陽翟縣也

又曰王元說隗囂曰今天水完富士馬最強北收西河
上郡東收三輔之地按秦舊迹表裏河山秦外山而內河元請
以一丸泥為大王東封函谷關此萬世一時也

又曰河南賊張步據齊地耿弇討敗之步肉袒負斧鑕

於軍門

鑕鑕也示必死
鑕音竹林反

弇傳步詣行在而勒兵入據其城

樹下二郡旗鼓

弇凡平城陽琅邪高密膠東東萊北
海齊千乘濟南平原泰山臨淄等

令步兵

各以郡人詣旗下衆尚千餘萬輜重七千餘兩皆罷遣

歸鄉里齊地悉平

又曰建安中劉表為荊州牧

即今江陵郡也

玄德時在荊州衆

力尚少諸葛亮曰荆非少人也而著籍者寡平居發調

即人心不悅凡有游戶皆使自實因錄以一衆可也玄

德用其計故表衆遂強其後表幼子琮乃以州衆附於

曹操

又曰百官志云鄧從武賁比二百石

東觀漢記曰上賜馮異璽書曰聞吏士精銳水火不避

構賞之士必不令將軍負丹書失斷金也

魏志曰張繡反魏太祖出戰不利輕騎引去典韋戰於門中賊不得入兵遂散從他門並入時韋校尚有十餘人皆殊死戰無不一當十賊前後至稍多韋以長戟左右擊之左右死傷者畧盡

晉書曰桓玄使陶謙屯覆舟山劉毅至蔣山裕棄弱登山多張旂幟玄不知測裕與毅分為數隊進突謙陣皆殊死戰無不一當百謙等諸軍一時奔散

裕則劉裕也

又職官志曰左衛將軍領雄渠武賁右衛將軍領飛武賁

又天文志曰武賁一星在太微西蕃北下名南靜室旄頭之騎官也

徐爰宋書曰衆推高祖為盟主移檄京邑遇吳甫之者驍將也其兵甚銳高祖躬執長刀徑入其陣衆皆披靡甫之進至羅洛橋高祖望賊旂鼓誓衆馳進挺劍指麾光耀如電將士皆莫敢仰視但馮神武爭為先登殊死戰無不一當百

蕭方等三十國春秋曰陳安奔隴城前趙將劉賁馳將

追之石虎止賁曰窮寇歸兵不可迫也我士卒連勝
皆已怠矣以驕怠之卒當致死之衆恐無萬全之
利賁曰不然彼銳氣盡矣衆心畢沮人懷苟免莫
有鬪志我卒乘猛氣甚盛皆一當十豈彼沮喪之
餘所能抗者乃躬先士卒戰輒敗之遂圍安於隴
城

又曰定陽人梁犢因怨趙也謀兵東還犢自稱大將軍
率衆攻下辨尅之犢軍人皆多力善射一當十餘無兵

甲惟用大斧施一丈柯攻戰若神所向崩潰

後魏書曰趙燕鳳嘗使於苻堅曰彼國人馬實為多少
鳳曰控弦之士數十萬見馬百萬足堅曰卿言人衆可
爾說馬太多是虛辭耳鳳曰雲中川自東山至西河二
百里北山至南山百有餘里每歲孟秋馬常大集畧為
滿川以此權之使人言之猶尚未盡堅厚加贈遺

又曰宋遣沈攸之吳禧公領卒數萬從汴清而進欲援
下邳尉元遣孔伯恭率步騎一萬以拒之并以攸之前敗軍

人傷殘手足瘡瓦膝行者盡送令還

又官氏志曰太和中定品令有戰盾武賁將軍有募員
武賁將軍有高車武賁將軍

又曰河北賊葛榮為魏將爾朱榮所擒餘衆悉降以賊
徒既衆若即分部恐其疑懼或更結聚乃普告聽從所
樂親屬相隨任所居止於是羣情喜說登即四散數十
萬衆以時散盡待出百里之外乃使分道押領隨便安
置咸得其宜擢其渠帥良才授用新附者咸安時人服

其處分幾速

三國典畧曰凡諸部曲平使招攜赴投戎行前後行集
霜戈電戟無非武庫之兵龍甲犀渠皆是雲臺之仗

文選曰雲屯七萃士魚麗六郡兵

又曰士馬精研

陸士衡辨亡論曰於是雲興之將帶州飈起之師跨邑
哮闕之羣風驅熊羆之衆霧集

又曰夫曹劉之將非一世所選向時之師無曩日之衆

又曰孫子荊為石仲容與孫皓書曰今百僚濟濟俊乂
盈庭虎臣武將折衝萬里國富兵強六軍精練

隊伍

太白陰經曰陽隊起一至九陰隊起九至一隊有五十
人五人火長五九不失四十五人之數卒間容卒相去
二步隊間容隊相去一十八前後十步隊其前後相去
亦如之黃帝曰車間容車隊間容隊曲間容曲是也

衛公兵法曰諸道狹不可並行者即第一戰鋒隊為首

其次右戰隊次之其次左戰隊次之其次右駐隊次之其次左駐隊次之若道平川闊可以並行者宜作統法每統戰之銳隊居前兩戰並行次之又兩駐隊並行次之餘統准此若更堪齊頭行者每統五隊橫列齊行後統次之如每統三百人簡取二百五十分為五隊第一隊抑戰鋒第二隊為主隊隊頭一人副隊頭一人其下等五十人為輜重隊別著隊頭一人每戰日守輜重遙為聲援若兵數更多皆類此諸將軍折衝果毅必須排

定隊伍每引行發營須依次第戰日有罪須罰有功須賞依名排次甚為省易不然推逐稍難爭競不定

又曰每隊各給一旂行則引隊住則立於隊前大總管及副總管則立十旂以上副總管則立四旂以上行則前住則立於帳側統頭亦別給異色旂擬臨陣之時辨其進退駐隊等旂別樣別造另引輜重各令本營行隊識認此旂諸軍相去既遠語聲難徹走馬報又勞煩故建幟用為節度旂方面旂舉當方面兵急須裝束旂向

前亞方面兵急須進旂三豎即住旂卧即為審細看大

將所舉之旂

大將方面旂東方碧南方赤西方白北方黑專看方色亞處即是其方賊來便須禦

捍攻擊

又曰諸軍將戰每營跳盪隊馬軍隊奇兵隊戰鋒隊駐隊等分折為五等當軍各令一官押令出戰之時先用集等兵戰鬪如更須兵以次更須某等兵用盡當營輜重隊不得輒用亦各一官人押令使壁壘各令行其部伍不使紛雜自餘節度一依橫陣



太平御覽卷二百九十九